

Olwaandiko lwa Paulo aha Bakolosai Obweébeembezi

Kolosai gukaba guli omuzihwa muche omuli Asia. Ebilo ebi Kolosai ne echinogóka che éensi ya Buturuki. Ekaba eli ekilomíta 175 kuluga omuzihwa gwa Efeso áaho Paulo akalaangaana Empola Nzima habwa Yeézu (Amakúlu ge Entumwa 19). Náho Paulo weényini talayegesize Kolosai okwo, náho embága ya abaheémba ba Kolosai ekabaanziswa no omuuntu óogwo akaba naayétwa Epafra.

Obuchilo Paulo akaba ali omu ibóhelo, Epafra akeeza, yaábugana náze, yaámugaambila habwa abeégesa be ebisuba abaabeele nibaagalaza Abakristu. Omu Bakristu bo okwo Kolosai hakaba heena embága ibili, Abakristu ba Abayahudi na abáandi be Echiyunani. Mbweénu, omuli ezo mbága ibili, bakaba nibeénda kutulaaniza ameégeso ga Yeézu ne edíini záabo za kala.

Abaantu be Echiyahudi áabo bakeegesa ameégeso ge ebisuba, bakaba bali abalikwiikiliza nka nikwo boónyini na abaantu áabo abaatoziibwe na Múungu. Bakaba niboolekeelela nka nikwo no óobu kábilaaba omuuntu akaba ali omuheémba wa Yeézu, taladulize kukuúndilwa na Múungu keélaaba atákasázilwe ikóba lyoómwe no kukulaatila ebilagilo ne emizeenzo za Abayahudi. Abaantu abali Abayunani áabo bakeegesa ameégeso ge ebisuba, bakaba nibeekiliza nka nikwo, habwo kuba Múungu

tayina bihen, tiyaákuhikize kuhaanga éensi éezo bakazibona eyina ebiheno. Káandi bakaba nibee Kiliza nka nikwo omubili gwo omuuntu gwiina ebiheno, habwe éecho tityaákukuundileene Yeézu aábe Múungu na káandi atuúle omu nsi nko omuuntu.

Paulo naagalulila ameégeso áago ge ebisuba omu kugaamba amazima habwa Yeézu. Yeézu Kristu ni Múungu, akahaanga éensi, na niwe mukúlu we ebihaángwa byóona. Akatuula omu nsi ali omuuntu, yaáfwa habwe ebiheno béetu abone kutuganyila. Áago akakola Yeézu nigahika butúnu. Omuntu kaalikumwiikiliza Yeézu, Múungu naamwiikiliza. Tihaliho chihika cho kusálwa ikóba nali kukulaatila ebiilagilo nali emizeenzo yóona yóona.

Paulo naabagaambila Abakristu nka nikwo, ni lwaampaka baleke entúungwa mbi za kala, no omwáanya gwaáho batuúle obulami obusha óobwo obulikumusemeleza Múungu. Naasoomboola ago omu kweégesa nka nikwo óokwo abaséeza na abakázi, abazéele na abáana, na abahálila na abahíte, balikweendelwa bakoleláne.

Empola

¹ Olwaandiko olu niimbaandikila íinye Paulo, nkéetwa habwo okweenda kwa Múungu, kuba entumwa ya Kristu Yeézu. Íinye hamo no omwiikiliza muzeenzi wéetu Timoteo,

² nitubaandikila íimwe abaantu ba Múungu áabo mulikutúula okwo Kolosai, íimwe abee Kiliza bazeenzi béetu abeésigwa omu kukwaátana na Kristu.

Embabazi no obuhóolo kuluga ahali Isíichwe Múungu, bibe hamo neemwe.

Okusaba no okusiima habwa Múungu

³ Buli káanya óobu tulikubasabila íimwe, nitu-musiima Múungu, Íise wo Omukáma wéetu Yeézu Kristu,

⁴ buluga obu twaáhuliile óokwo mu-likumwiikiliza Kristu Yeézu no okweenda abaantu bóona ba Múungu.

⁵ Okwiikiliza kwéenyu ne engoonzi záanyu nizilugiílila omu kutegeza kwéenyu okwo mwa-teelilwého ensáho yaábyo okwo omu igulu, ne empola ze ensáho éezo mwaámazile kuhuliza aha chigaambo cha amazima ge Empola Nzima.

⁶ Empola Nzima ezo ekahika hali íimwe, ekasu-ungaanwa omu nsi yóona. Neezeendelela hóona kuleételela abaantu kumuhiindukila Múungu, nko óokwo yaabeele hali íimwe kulugiilila echilo echo mwaáhuliile habwe embabazi za Múungu no kusoombookelwa kuzima nka nikwo embabazi yoómwe óokwo éli amazima.

⁷ Íimwe mukeéyega ezo Empola Nzima kuluga ahali Epafra. Weényini no omuheéleza muzeenzi wéetu engaanzi, na no omweésigwa aha ku-mukolela Kristu emilimo ha bwéenyu.

⁸ Na niwe ayaatugaambíile empola ze en-goonzi zéenyu éezo mwaáhéelwe no Omwooyo Mutakatíifu.

⁹ Ha bwéecho, íichwe titukalekile kubasabila, kulugiilila echo chilo chi twaahuliize empola záanyu. Na áago tulikusaba Múungu ni nka nikwo, abáhe okusoombookelwa kuzima en-goonzi zoómwe, omu kubaha íimwe engeso zóona

no obumanyi óobwo obulikuluga aha Mwooyo Mutakatífu.*

¹⁰ Niho mulaahicha kutúula óokwo Omukáma Yeézu alikweenda, no kumunuliza omu magaambo góona. Obulami bwéenyu nibumunuliza habwe emilimo yáanyu mizima, káandi nimuguma kumusoombookelwa Múungu.

¹¹ Nitusaba Múungu aábe naabagumya aha magala goómwe maháango, kuba mubóne kweéyomeleza byóona mutéena kulemwa. Mbwéenu, mube na amanulilwa

¹² nimumusiima Isíichwe Múungu, habwo kuba ababonesize kukoba obuhuunguzi bwa abaantu boómwe omu bukáma bwo omwaanga.

¹³ Atuchuongwiile kuluga omu magala ge ensi-imbaazi, atufulwiile no kututaasha omu bukáma bwo Omutábani enganzi.

¹⁴ Habwo kulabila aha Mutábani woómwe ogwo, tuchuongwiilwe omu kuganyilwa ebiheno byéetu.

Kristu ayina obuzizi habwa byóona

¹⁵ Kristu naayoleka butúnu nka nikwo Múungu kwaáli,

nóobwo weényini Múungu takubonwa.

Weényini niwe mukúlu we ebihaángwa byoona, kanyina wo obuzizi aha bihaángwa byóona.

¹⁶ Habwo kuba kulabila hali weényini, ebiintu byóona bikahaangwa, ebyo ebili omu igulu ne ebili omu nsi,

* **1:9 1:9 Kubaha úmwe engeso zóona no obumanyi óobwo obulikuluga aha Mwooyo Mutakatífu:** Ensoonga éendi ni nka nikwo, kubaha úmwe amasala méenzi no obumanyi bwo mwooyo.

éebyo tulikubona ne éebyo tutakubibona,
keélaaba abakáma nali abeena ikuzo, abatégeki
nali abeena amagala,
byóona bikahaangwa kulabila hali weényini na ha
bwoómwe.

17 Weényini akaba aliho ebiintu byóona bitaka-
haangilwe,
náwe aha buhicha bwoómwe ebiintu byóona
nibizeendelela kubaho.

18 Weényini niwe omútwe gwo omubili, niyo
ekelezia.

Weényini niwe entaándikilo yo obulami obulikwi-
iza obusha,

niwe owa mbele kuzooka kuluga omu bafwiile,
abone kuba mukúlu omu biintu byóona.

19 Ni bityo, habwo kuba ekamusemeleza Múungu,
nka nikwo bu Múungu bwoómwe bwóona bwi-
ikale aha Mutábani.

20 Káandi ekamusemeleza nka nikwo kulabila
ahali Kristu,

akwaátanize ebiintu byóona na weényini,
ebiintu ebili omu nsi omu ne ebili omu igulu.

Akakola aátyo, habwo kuléeta obuhóolo,
kulabila enságama ya Kristu éezo ekaseeseka aha
musalaba.

21 Aho enyuma neemwe mukaba muli hala na
Múungu. Mukaba muli ababisa boómwe, habwe
ebiteékuzo ne entúungwa zéenyu mbi. Náho óobu
Múungu abakwaatanize náwe,

22 aha muháanda gwo omubili gwa Kristu
kufwa. Akakola aátyo kuba abaléete omu méeso

goómwe muli abatakatiifu, mutéena akatokoozi nali kutuúzilwa.

²³ Náho nimweendelwa kuzeendelela kwiikiliza Empola Nzima, kamulaaba muli abalame no kuba na amagala. Muteekiliza kuhiinduka no kwiíluka itegezo elyo mukaheebwa obuchilo óobwo mwaáhuliile Empola Nzima. Empola Nzima ezo nyini éezo eyolekeeliilwe ahali buli muuntu ali aheéfo yo obwíile, na nigwo omulimo, ínye Paulo, nkahaabwa kuba omuheéleza waágwo.

Echihika cha Paulo aha Bakolosai

²⁴ Óobu niimbinulilwa ebyaágälazo éebyo nnyinabyo ha bwéenyu. Aha mubili gwaanze niinhikiíliza ebyaágälazo bya Kristu éebyo ebyaalebile habwo omubili gwoómwe, ensoonga yaáho, ekelezia yoómwe.

²⁵ Kwiingana no óokwo yaáyeenzile, Múungu ankozile ínye kuba omuheéleza woómwe habwe ekelezia, mbone kuboólekeelela ímwe echigaambo choómwe chóona habwo omugaso gwáanyu.

²⁶ Echigaambo echo nigwo omweétegeko gwoómwe óogwo ogukaselekwa kulugiilila kala aha nzaálwa zóona, náho óobu Múungu agusuúlulwiile aha abaantu boómwe.

²⁷ Múungu akanulilwa kubasuululila abaantu boómwe omugaso gwo omweétegeko ogwo gwo

kusobeza óogwo akakola no óobu ha Abanyama-haánga.† Omweétegeko ogwo ni nka nikwo Kristu ali omuli ímwe, káandi nka nikwo weényini Kristu niwe alikubaha obweésige nka nikwo nimukoba omu ikuzo lyoómwe.

²⁸ Kristu niwe óogwo tulikwoólekeelela buli tulikuhana no kweégesa abaantu bóona omu bwéenze bwóona. Nitumwoolekeelela weényini, tubone kumuléeta buli muuntu omu méeso ga Múungu, baabeele abahikile omu kukwaátana kwáabo na Kristu.

²⁹ Na habwe ensoonga ezo, niinyeyomeleza aha chihika omu kukoza amagala maháango áago Kristu ambonesa.

2

¹ Niinyeénda musoomboókelwe óokwo nnyine echífu chiháango che emilimo ha bwéenyi, habwa abaantu abo omu muzihwa gwa Laodisia, na habwa bóona abáandi áabo abachaáliga kubonana neenye.

² Niinkola íintyo babone kugumisibwa omu miganya no kukwaátanisibwa omu ngoonzi. Niinyeénda babone obumanyi bwóona óobwo obulikubaha obweétegeelezi. Niho balaasoomboókelwa obuliho habwe entaahililo za Múungu éezo ekaba eli olufubo buluga kala, nayo no kumusoombookelwa Kristu weényini.

³ Omuli weényini nimwo ziiselekile ensáho zóona ze engeso no obumanyi.

† **1:27 1:27 Abanyamahaánga:** Habwo obusoomboozi bwooli osome *Obusoomboozi habwa Amagaambo Agagumile.*

⁴ Niimbagaambila echi chigaambo, kuba mu-teekiliza kubéehwa béehwa no omuuntu weéna weéna aha amagaambo ge ebisuba, no óobu galáaba na go kubeételela bwooli.

⁵ Niingaamba íntyó nóobwo ntali hamo neemwe ha mubili, náho omwooyo gwaanze guli hamo neemwe. Niinulilwa habwo kuba niinhuliza habwo obúmo bwáanyu no kwoongelwa kwáanyu aha kumwiikiliza Kristu.

Obulami obusha omuli Kristu

⁶ Mbwéenu óobu, habwe ensoonga mwaámwiikiliza Kristu Yeézu nka nikwo no Omukáma, muzeendelele kumukoondookela omu bulami bwéenyu bwóona.

⁷ Muzeendelele kutaashamo emizi yáanyu omuli weényini, mube mwoómbekilwe aha lugulu yo oluhazo lwoómwe, no kwiimeelela bweémi omuli áago tulikwiikiliza nko óokwo mwaayegesizwe. Káandi mube abaantu áabo abalikumusiima Múungu buli káanya.

⁸ Mube méeso, mutaákwiiza mukaba enkwáate habwa ameégeso ga busa na age ebisuba. Ameégeso ago nigalugiílila omu méégeso ga abaantu, ne emitegeko éezo ezilikutégeka éensi ezi.* Ameégeso ago tigakuluga ahali Kristu,

⁹ habwe ensoonga obuhikiilizwa bwóona bwa Múungu buli omuli weényini, omu mubili gwo obumuuntu.

¹⁰ Neemwe muheelwe obulami obuhikile, habwo kuba mukwaateéne na Kristu. Weényini

* **2:8 2:8 Emitegeko éezo ezilikutégeka éensi ezi:** Ensoonga eéndi ni nka nikwo, emyooyo éezo elikutégeka éensi ezi.

niwe mukúlu habwa abatégeki na abeena amagala bóona omu nsi yo omwooyo.

¹¹ Obuchilo obu mwaákwaáteene na Kristu, mukeehibwaho obumuuntu bwe ebiheno omu kusálwa ikóba[†] na Kristu. Timulasázilwe aha ngalo za abaantu, náho weényini niwe ayaakozile.

¹² Obuchilo mwaabatiizwe, obumuuntu bwáanyu bwe ebiheno bukafwa bwaáziikwa hamo na Kristu. Niho mwaázoolwa hamo náze, habwo kuba mukeekiliza amagala ga Múungu óogwo akamuzoola kuluga omu bafwiile.

¹³ Obuchilo mutakazweelwe, mukaba muli nka abáfwiile habwe ebiheno byáanyu, káandi mukaba mutasázilwe obumuuntu bwáanyu bwe ebiheno. Náho Múungu abaheéle obulami hamo na Kristu, náwe atuganyíile ebiheno byéetu byóona.

¹⁴ Múungu atulihile ibáanza lye ebiheno byéetu aha muháanda gwa Yeézu kutufwéela aha musalaba. Ni nkoóti akeehaho amaandiko ge ebiheno byéetu ebyo ebilagilo bilikutulegelela, omu kugagoógootela aha musalaba.

¹⁵ No omu kukola aátyo, Kristu yaáyaka amagala gáabo abo batégeki na abeena amagala ge nsiimbaazi, yaábasiinga aha manulilwa, yaábagoola aha bwéelu.

¹⁶ Ha bwéecho, mutabahuliiliza abaantu obu balaabachwaaziíkila ímwe nka nikwo muli abaheni ha kuba timukukoondookela ebilagilo omu kulya no okunywa, nali amazenyi ge edíni, nali amazenyi go kusohoza okwéezi, nali echilo che

[†] **2:11 2:11 Kusálwa ikóba:** Habwo obusoombooji bwooli osome *Obusoombooji habwa Amagaambo Agagumile.*

Endaálíkizo.‡

¹⁷ Ago góona gakaba gali echibého cha amagaambo áago agalikwiiza. Náho amagaambo aga mazima nigabonwa omuli Kristu weényini.

¹⁸ Heena abaantu áabo abalikukomeenteleza bwooli amagaambo go okweécheesha ahéelu no kulamya bamaléeka. Káandi, nibagaamba nka nikwo ímwe timugasize kwiinaankula empeéla yáanyu eyo obucha no obuchiile. Mutabeékiliza no obuche bwa akáti no óobu oómo omuli boónyini. Abaantu abo nibeebuga, habwo kuba nibagaamba nka nikwo babweene amagaambo ago omu meezaho. Náho aha mazima, basiluheéle habwe ebiteékuzo byáabo bíbi bye etuúngu yo omubili.

¹⁹ Abaantu abo batageene na Kristu óogwo alikweébeembelela ekelezia, eli omútwe gwo omubili gwoómwe. Kristu niwe alikuliisa no kuteélanisa hamo enzíngo ne emisi zóona. Bityo, omubili gwoómwe gwóona nigukula kuzima nka nikwo Múungu alikweendaho.

²⁰ Ímwe, entúungwa zéenyu ze ebiheno zikafwa hamo na Kristu, habwo kuba akabachuúngula mutazeendelela kukoondookela emitegeko éezo ezilikutégeka éensi ezi. Mbweenu, na ha bwaáchi mucháali nimutuúla nka abaantu bo omu nsi ezi? Muteekililizana kugomookela ebilagilo nke ebi,

²¹ “Mutakwáata echi! Mutakólaho echo! Mutaloza echo!”

‡ **2:16 2:16 Endaálíkizo:** Habwo obusoomboozi bwooli osome *Obusoomboozi habwa Amagaambo Agagumile.* **2:20 2:20** Osome Abarúumi 6:1-11; Abagalatia 5:19-20; Abakolosai 2:12. **2:20 2:20** Osome Abakolosai 2:8.

²² Ago góona ne ebilangilo na ameégeso ga abaantu kwoónka habwe ebiintu éebyo ebilikusi-isikala kabilikuba byaákolesiibwe aha mwáanya muche.

²³ Na amazima, abo abalikukulaatila amagaambo ge ebyo bilagilo nibaloléeelwa nka nikwo beena amasala. Nibakulaatila okulamya okwo beteeliileho boónyini, embabazi za ahéelu no kutégeka omubili gwáabo aha cháaha. Náho ebilangilo ebyo tibikuhicha kwaángila etuúнку mbi zo omubili.

3

¹ Óobu, habwo kuba muzwéelwe hamo na Kristu, mweékomye amagaambo go omu igulu, áaho Kristu ayikéele olubazu lwo obúlyo lwa Múungu.

² Muteekuze amagaambo ago agali omu igulu, mutatéekuza ago omu nsi óomu,

³ habwo kuba obumuuntu bwáanyu bwe ebi-heno bukafwa bwaáziikwa hamo na Kristu. Óobu nimutuúla hamo na Kristu omu méeso ga Múungu, náho obulami obwo hamo na weényini tibukubonwa.

⁴ Obulami bwáanyu nibulugiílila omuli Kristu. Obuchilo óobwo alibonwa, niho neemwe muli-bonwa hamo na weényini omu ikuzo lyoómwe.

⁵ Mbwéenu óobu, mugasabule hala bwooli amagaambo góona go omu nsi ezi agali omuli íimwe, nko obuseégu, obulofo, akahagáli, etuúнку mbi, ne etuúнку za amabonwa. Kuba ne etuúнку

za amabonwa ni chimo no kulamya ebisusano okabula kulamya weényini Múungu.

⁶ Amagaambo nka ago, nigo galikutwaálilila Múungu anigahalile abaantu áabo abataku-mukoondookela.*

⁷ Kala, ímwe nyini mukazeendeleda omuli ago, obuchilo óobu mukaba nimutuúla omuli boónyini abeena entúungwa zítyo.

⁸ Náho óobu muhule butúnu amagaambo ago góona hamo na agáandi nke echiníga, echihulumuko, obubi, ebizumi, ebigaambo bye ensoni, ebyo byóona bitabamo omu kanwa káanyu.

⁹ Mutasoomboólelana ebisuba, habwo kuba mwaábuzwiile obulami bwéenyu bwa kala hamo na amakúlu gaábwo góona,

¹⁰ na muzweele obulami obusha. Múungu weényini akahaanga obulami obwo obusha, na naazeendeleda kubakola mususane bwooli no obwo bulami bwoómwe, kuba mubóne kumusoombookelwa kuzima bwooli.

¹¹ Ha nsoonga ezo, tiheena okuchilana káandi aha Muyahudi no Omunyamahaánga, óogwo asázilwe ikóba lyo obuséeza no óogwo atákasázilwe ikóba lyoómwe, omuuntu óogwo ali omuséenzi no obu alikuba ali omuséenzi asagiliize, no obu omuhálila na atali omuhálila. Náho Kristu niwe buli chiintu na weényini alimo omuli bóona.

¹² Óobu, habwo kuba ímwe mubeele abatoziibwe ba Múungu, na abatakatífu áabo

3:5 3:5 Osome Abaefeso 5:5. * **3:6 3:6** *Abaantu áabo abatakumukoondookela:* Amaandiko agáandi ge Echiyunani tigéena amagaambo ago. Osome Abaefeso 5:6. **3:11 3:11** Osome Abarúumi 10:12; Abagalatia 3:27-28; 6:15.

alikleenda, mube no omuganya gwe echiganyizi, obufula, embabazi, obuchuleezi no kweébuundaaza.

¹³ Mweemelane no kweéganyila, kábilaaba oómo wáanyu ayinacho echigaambo chibi habwa muzeenziwe. Nimweendelwa kweéganyila nko óokwo Omukáma akabaganyila ímwe.

¹⁴ Obusáago bwa ago góona mweendane, habwo kuba engoonzi nizo zilikubakwaátanisa mwéena omu búmo óobwo obuhikile.

¹⁵ Obuhóolo bwa Kristu butégeke omu miganya yáanyu. Ímwe mubeele omubili gúmo, ha bwéecho mweesilwe kutúula habwo obuhóolo. Káandi mube nimumusiima Múungu.

¹⁶ Echigaambo cha Kristu chiikale ha bwíinzi omuli ímwe kamulikweégesana na kamulikweéhana omu ngeso zóona. Mumuzinile Múungu kuluga omu miganya yáanyu no okusiima, omu kukoza ezaburi, ne enzina zi ikuzo, ne zo omu mwooyo.

¹⁷ Goóna góona áago mulikugaamba nali kukola, mugakole ahi izíina lyo Omukáma Yeézu, nimumusiima Isíichwe Múungu kulabila hali weényini.

Kutúula kuzima omu nzu za Abakristu

¹⁸ Ímwe abakázi, mube nimubakoondookela bebeenye, nko óokwo elikleendelwa aha baantu áabo abalikumwiikiliza Omukáma Yeézu.

¹⁹ Neemwe abaséeza, mube nimweénda abakázi báanyu, mutaakuba enduluhe hali boónyini.

²⁰ Neemwe abáana, mube nimubakoondookela abazéele báanyu omuli góona, habwo kuba kukola mútyo nikumunuliza Omukáma Yeézu.

²¹ Neemwe ba táata, mutabasaambila abáana báanyu, kuba bataákwiiza bakagwa omuganya.

²² Ímwe abahálila, mubakoondookele abakáma abalikubatégeka, omu milimo yóona. Mu-taákuzila mútyo omu buchilo óobwo balikuleeba kwoónka, mubóne kweéseengeleza hali boónyini, náho mubazilile isima obuchilo bwóona omu bugololoke bwo omuganya, habwo kuba nimu-mugomookela Omukáma Yeézu.

²³ Choóna chóona éecho mulikukola, muchikole aha muganya gúmo, kamulaamuheéleza Omukáma, na ti baantu kwoónka.

²⁴ Mwiizuke nka nikwo Omukáma wo mulikukólela niwe Kristu, na weényini naabaha omuhuungulo gwáanyu guli empeéla éezo akalagana neemwe.

²⁵ Náho weéna wéena óogwo alikukola amábi, naayinaánkula kwiingana no obubi bwoómwe, habwo kuba Múungu tasoloola muuntu weéna wéena.

4

¹ Neemwe abakáma, mube nimubakolela abahálila báanyu aha mazima ne éebyo ebikwiilwe. Mwiizuke nka nikwo neemwe káandi mwiináze Omukáma omu igulu.

Ebilagilo no okusaba kwa Paulo

² Mube nimusaba ebilo byóona, mube méeso omu kusaba no kumusiima Múungu.

3:20 3:20 Osome Abaefeso 6:1. **3:21 3:21** Osome Abaefeso 6:4.

3:25 3:22-25 Osome Abaefeso 6:5-8.

³ Mutusabile neechwe, Múungu abone kutuchiíngulila omulyaango gwo kwoólekeeela echigaambo choómwe, cho kwaátula empola habwa Kristu éezo ekaba eselekilwe kala. Neenye mbohilwe habwo kwoólekeeela empola ezo.

⁴ Mube nimumusaba Múungu nka nikwo íimbe na amagala go kwoólekeeela aha bwéelu empola ezo nka nikwo ndikweendelwa nzigaámbe.

⁵ Mube na amasala omu kubakolela abaantu áabo abatakamwiíkiliize Yeézu. Mukoze obuchilo bwáanyu kuzima.

⁶ Omwáanya gwóona, amagaambo gáanyu gabe go omugisa káandi go kukoonza koonza nko omwóonyo, mubóne kusoombookelwa kumugalulila buli muuntu kuzima.

Amagaambo go kulaga

⁷ Omwiikiliza muzeenzi wéetu engaanzi Tikiko, alaábagaambila empola zaanze zóona. Weényini no omuheéleza muzeenzi wéetu omweésigwa óogwo tulikukola hamo náze emilimo zo Omukáma Yeézu.

⁸ Niimmusiindika hali íimwe, mubóne kusoombookelwa óokwo tulikuzeendelela no kubatiimbya emiganya.

⁹ Naayiza hamo na Onesimo, omwiikiliza muzeenzi wéetu engaanzi omweésigwa, óogwo ali omuuntu wo owáanyu. Nibabasoomboólela amagaambo góona áago agalikukolwa owéetu aha.

¹⁰ Aristariko, óogwo abohilwe hamo neenye omu ibóhelo aha, naabaangalucha. Náwe Mariko, ali nyínálumi wa Barinaba, naabaangalucha. Mwaámazile kwiinaankula ebilagilo

habwa weényini. Obuchilo alaahika hali ímwe, mumwiinaánkule kuzima.

¹¹ Yeézu óogwo alikwéetwa Yusto, naabaangalucha. Omu Bayahudi áabo bamwiikiliize Yeézu Kristu, aba básatu kwoónka nibo balikukola emilimo habwo obukáma bwa Múungu hamo neenye. Nábo baantiimbisize omuganya bwooli.

¹² Epafra, omuzáana wa Kristu Yeézu na káandi omuuntu wo owáanyu, naabaangalucha. Obuchilo bwóona akola echífu kubasabila ímwe nka nikwo, mube abahikile omu kwiikiliza kwéenyu, na mukomeéle omu ngoonzi zóona za Múungu.

¹³ Niimmusiínza nka nikwo, naakola emilimo aha chífu ha bwéenyu na habwa abaantu bo omu mizihwa za Laodisia na Hierapoli.

¹⁴ Luka omulaguzi wéetu engaanzi, na Dema, nibabaangalucha.

¹⁵ Ímwe, mubaángaluche abeekiliza bazeenzi béetu ba Laodisia. Káandi mumwaángaluche Nimufa, ne ekelezia éezo elikubugana omu nzu yoómwe.

¹⁶ Olwaandiko olu kalulaaba lwaásomilwe hali ímwe, muluhiche aha beekiliza be ekelezia ya Laodisia kuba abo káandi balusome. Neemwe muloondele omuháanda gwo kubonesa no kusoma olwaandiko óolwo nkabasiindikila boónyini.

¹⁷ Mumugaambile Arikipo nka nikwo, azeétegeeleze kuzima emilimo éezo Omukáma akamuha.

¹⁸ Ínye Paulo niimbaangalucha ha kwaandika ne engalo yaanze. Mwiizuke nka nikwo mbohilwe omu ibóhelo. Embabazi ya Múungu eébe hamo neemwe.

Endagano Eénsha omu Chiziinza
Portions of the Holy Bible in the Zinza language of
Tanzania: Endagano Eénsha omu Chiziinza (New
Testament+)

copyright © 2024 Wycliffe Bible Translators, Inc.

Language: (Zinza)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Jul 2025 from source files dated 10 Jul 2025

ec04e043-ebb2-5393-a814-029b879f102a